

Lebih deposit sekuriti AS\$790.3j masuk akaun Najib

BH- 1/10/2019 m/s: 16

Proses ambil alih Genting Sanyen dilakukan tergesa-gesa

Oleh Ahmad Johari Mohd Ali, Siti Nurazlinee Azmi dan Farah Marshita Abdul Patah bhnews@bharian.com.my

Kuala Lumpur: Lebih wang daripada deposit sekuriti berjumlah AS\$790.3 juta, bagi pengambilalihan ekuiti Genting Sanyen (M) Sdn Bhd oleh 1Malaysia Development Berhad (1MDB) diatarkan ahli perniagaan, Jho Low dan diselewengkan sebelum dimasukkan ke dalam akaun Datuk Seri Najib Razak.

Perancangan Jho Low atau nama sebenarnya Low Taek Jho itu bagi membolehkan wang 1MDB masuk ke dalam akaun yang dikawal olehnya, sebelum dimasukkan ke dalam akaun bekas per-

dana menteri itu.

Proses pengambilalihan syarikat itu pula dilakukan secara tergesa-gesa, dibandingkan dengan pengambilalihan Tanjong Energy Holding Sdn Bhd (TEHSB) oleh 1MDB.

Bekas Ketua Pegawai Eksekutif (CEO) 1MDB, Datuk Shahrol Azral Ibrahim Halmi, dalam keterangannya berkata pengambilalihan Genting Sanyen dilaksanakan melalui pembiayaan pinjaman jangka pendek (*bridging loan*) berjumlah RM700 juta dan terbitan bon berjumlah AS\$1.75 bilion.

Shahrol Azral yang juga saksi pendakwaan kesembilan berkata, terdapat lebih yang banyak daripada hasil pembiayaan untuk pengambil alihan itu.

Saksi itu berkata, bagaimana pun beliau tidak mengetahui bahawa lebih wang untuk pembayaran deposit sekuriti AS\$790.3 juta yang dibayar kepada Aabar Investment PJS Ltd (syarikat usahasama 1MDB), adalah untuk diseleweng oleh pihak lain.

"Pembayaran deposit sekuriti itu dibuat secara *good faith* ber-

dasarkan dokumentasi yang disediakan peguam 1MDB, Jasmine Loo Ai Swan; Terence Geh (bekas pengarah kewangan) dan Tim Leissner (CEO Goldman Sachs Global).

"Selepas penyiasatan dilakukan barulah saya tahu yang deposit sekuriti itu diaturkan oleh Jho Low, untuk membolehkan wang 1MDB masuk ke dalam akaun yang dikawal olehnya untuk tujuan penyelewengan, seterusnya dimasukkan ke dalam akaun milik Najib," katanya.

Shahrol Azral berkata, beliau berpandangan proses pengambilalihan Genting Sanyen dilakukan tergesa-gesa, kerana kelulusannya hanya dibuat melalui Resolusi Pekeliling Pekeliling (DCR) tanpa dibentangkan dalam mesyuarat Ahli Lembaga Pengarah (BOD) 1MDB.

"Keadaan tergesa-gesa itu disebabkan oleh tekanan daripada Jho Low, yang menyatakan pinjaman dan jaminan daripada Petroleum Investment Company (PIC) itu harus disegerakan.

"Ini atas faktor kerjasama G to G (kerajaan kepada kerajaan) dan



Najib keluar dari Kompleks Mahkamah Kuala Lumpur, semalam.

(Foto Muhd Zaaba Zakeria/BH)

perlu diselesaikan sebelum PRU (Pilihan Raya Umum Ke-13) untuk memastikan cukup perhatian daripada Najib sebelum beliau sibuk berkempen," katanya.

Sementara itu, Shahrol Azral berkata, Jho Low diberi mandat untuk membawa arahan daripada Najib kepada pihak pengurusan 1MDB.

Berdasarkan pengalaman beliau saksi itu berkata, Jho Low ada menegaskan bahawa semua urusan membabitkan pelaburan antara 1MDB dan Abu Dhabi serta Aabar Investment PJS Ltd (Aabar) sudah dipersetujui pemilik saham 1MDB, iaitu Najib.

Shahrol Azral berkata, ia terbukti dengan semua persetujuan rasmi yang ditandatangani bekas perdana menteri itu.

"Semua tindakan ini adalah

konsisten dan meyakinkan saya, walaupun Jho Low tiada kuasa secara rasmi dalam 1MDB.

"Sejak dari permulaan 1MDB lagi, saya tahu Jho Low diberi mandat membawa arahan daripada Najib kepada saya dan pengurusan.

"Contohnya, untuk pelaburan TRX (Tun Razak Exchange) ini memang ia dilakukan dengan sangat cepat, sama dengan projek usaha sama PetroSaudi International Ltd (PSI).

"Segala arahan, pelan tindakan dan nota maklumat diberikan dari pihak atasan ke bawah, iaitu melalui Jho Low dan baru kemudian disahkan melalui mesyuarat Ahli Lembaga Pengarah (BOD) atau Director Circular Resolution (Resolusi Pekeliling Pengarah (DCR)," katanya.